

第六七〇冊

經濟彙編

銓衡典

官制部

（卷）
三—四

古今圖書集成

中華書局影印



古今圖書集成

卷一百一十五

欽定古今圖書集成經濟彙編銓衡典

第三十五卷目錄

官制部彙考十三

唐一

銓衡典第三十五卷

官制部彙考十三

唐一

唐官制多沿隋故立六省九寺臺監衛府各統其屬以分職定位

按唐書百官志唐之官制其名號祿秩雖因時增損而大抵皆沿隋故其官司之別曰省曰臺曰寺曰監曰衛曰府各統其屬以分職定位其辨貴賤敘勞能則有品有爵有勳有階以時考覈而升降之所以任羣材治百事其爲法則精而密其施於事則簡而易行所以然者由職有常守而位有常員也方唐之盛時其制如此蓋其始未嘗不欲立制度明紀綱爲萬世法而常至於交侵紛亂者由其時君不能慎守而徇一切之苟且故其事愈繁而官益冗至失其職業而卒不能復初太宗省內外官定制爲七百三十員曰吾以此待天下賢材足矣然是時已有員外置其後又有特置同正員至於檢校兼守判知之類皆非本制又有置使之名或因事而置事已則罷或遂置

而不廢其名類繁多莫能備舉自中世已後盜起兵興又有軍功之官遂不勝其濫矣故採其綱目條理可爲後法及事雖非正後世遵用因仍而不能改者著於篇宰相之職佐天子總百官治萬事其任重矣然自漢以來位號不同而唐世宰相名尤不正初唐因隋制以三省之長中書令侍中尚書令共議國政此宰相職也其後以太宗嘗爲尚書令臣下避不敢居其職由是僕射爲尚書省長官與侍中中書令號爲宰相其品位既崇不欲輕以授人故常以他官居宰相職而假以地名自太宗時杜淹以吏部尚書參議朝政魏徵以祕書監參預朝政其後或曰參議得失參知政事之類其名非一皆宰相職也貞觀八年僕射李靖以疾辭位詔疾小瘳三兩日一至中書門下平章事而平章事之名蓋起於此其後李勣以太子詹事同中書門下三品謂同侍中中書令也而同三品之名蓋起於此然二名不專用而他官居職者猶假他名如故自高宗已後爲宰相者必加同中書門下三品雖品高者亦然惟三公三師中書令則否其後改易官名而張文瓘以東臺侍郎同東西臺三品同三品入銜自文瓘始末淳元年以黃門侍郎郭待舉兵部侍郎岑長倩等同中書門下平章事平章事入銜自待舉等始自是以後終唐之世不能改初三省長官議事於門下省之政事堂其後裴炎自侍中遷中書令乃徙政事堂於中書省開元中張說爲相又改政事堂號中書門下列五房於其後一曰吏房二曰樞密房三曰兵房四曰戶房五曰刑禮房分曹以主衆務爲宰相事無不統故不以一職名官自

開元以後常以領他職實欲重其事而反輕宰相之體故時方用兵則爲節度使時崇儒學則爲大學士時急財用則爲鹽鐵轉運使又其甚則爲延資庫使至於國史太清宮之類其名頗多皆不足取法故不著其詳學士之職本以文學言語被顧問出入侍從因得參謀議納諫諍其禮尤寵而翰林院者待詔之所也唐制乘輿所在必有文詞經學之士下至卜醫伎術之流皆直於別院以備宴見而文書詔令則中書舍人掌之自太宗時名儒學士時時召以草制然猶未有名號乾封以後始號北門學士元宗初置翰林待詔以張說陸堅張九齡等爲之掌四方表疏批答應和文章既而又以中書務劇文書多壅滯乃選文學之士號翰林供奉與集賢院學士分掌制誥書勅開元二十六年又改翰林供奉爲學士別置學士院專掌內命凡拜免將相號令征伐皆用白麻其後選用益重而禮遇益親至號爲內相又以爲天子私人凡充其職者無定員自諸曹尚書下至校書郎皆得與選入院一歲則遷知制誥未知制誥者不作文書班次各以其官內宴則居宰相之下品之上憲宗時又置學士承旨唐之學士弘文集賢分隸中書門下省而翰林學士獨無所屬故附列於此云

三師三公

太師太傅太保各一人是爲三師太尉司徒司空各一人是爲三公皆正一品三師天子所師法無所總職非其人則闕三公佐天子理陰陽平邦國無所不統親王拜者不親事祭祀闕則攝

注 隋廢三師貞觀十一年復置

尚書省尚書令一人正二品掌典領百官其屬有六尚書一曰吏部二曰戶部三曰禮部四曰兵部五曰刑部六曰工部庶務皆會決焉

六尚書兵部吏部為前行刑部戶部為中行工部禮部為後行行總四司以本行為頭司餘為子司凡上之逮下其制有六一曰制二曰勅三曰冊天子用之四曰令皇太子用之五曰教親王公主用之六曰符省下於州州下於縣縣下於鄉下之達上其制有六一曰表二曰狀三曰牋四曰啓五曰辭六曰牒諸司相質其制有三一曰關二曰刺三曰移凡授內外百司之事皆印其發日為程一日受二曰報諸州計奏達京師以事大小多少為之節凡符移關牒必遣於都省乃下天下大事不決者皆上尚書省凡制勅計奏之數省符宣告之節以歲終為斷

龍朔二年改尚書省曰中臺廢尚書令尚書曰太常伯侍郎曰少常伯光宅元年改尚書省曰文昌臺俄曰文昌都省垂拱元年曰都臺長安三年曰中臺

左右僕射各一人從二品掌統理六官為令之貳令闕則總省事劾御史糾不當者

龍朔二年改左右僕射曰左右匡政光宅元年曰文昌左右相開元元年曰左右丞相天寶元年復左丞一人正四品上右丞一人正四品下掌辦六官之儀糾正省內劾御史舉不當者吏部戶部禮部左丞總焉兵部刑部工部右丞總焉郎中各一人從五品上員外郎各一人從六品上掌付諸司之務舉稽違署符目知宿直為丞之貳以都事受事發展察稽

失監印給紙筆以主事令史書令史署覆文案出符目以亭長啓閉傳禁約以掌固守當倉庫及陳設諸司皆如之

隋尚書省諸司郎及承務郎各一人而廢左右司武德三年改諸司郎為郎中承務郎為員外郎貞觀元年復置左右司郎中龍朔元年改左右丞曰左右肅機郎中曰左右承務諸司郎中曰大夫未昌元年復置員外郎神龍元年省明年復置初有駟驛百人掌乘傳送符後廢

都事各六人從七品上主事各六人從八品下吏部考功禮部主書皆如之諸司主事從九品上有令史各十八人書令史各三十六人亭長各六人掌固各十四人

吏部尚書一人正三品侍郎二人正四品上郎中二人正五品上員外郎二人從六品上掌文選勳封考課之政以三銓之法官天下之材以身言書判德行才用勞效較其優劣而定其畱放為之注擬五品以上以名上而聽制授六品以下量資而任之其屬有四一曰吏部二曰司封三曰司勳四曰考功吏部郎中掌文官階品朝集祿賜給其告身假使一人掌選補流外官員外郎二人從六品上一人判南曹皆為尚書侍郎之貳凡文官九品有正有從自正四品以下有上下為三十等凡文散階二十九從一品曰開府儀同三司正二品曰特進從二品曰光祿大夫正三品曰金紫光祿大夫從三品曰銀青光祿大夫正四品上曰正議大夫正四品下曰通議大夫從四品上曰大中大夫從四品下曰中大夫正五品上曰中

散大夫正五品下曰朝議大夫從五品上曰朝請大夫從五品下曰朝散大夫正六品上曰朝議郎正六品下曰承議郎從六品上曰奉議郎從六品下曰通直郎正七品上曰朝請郎正七品下曰宣德郎從七品上曰朝散郎從七品下曰宣義郎正八品上曰給事郎正八品下曰徵事郎從八品上曰承奉郎從八品下曰承務郎正九品上曰儒林郎正九品下曰登仕郎從九品上曰文林郎從九品下曰將仕郎自四品皆番上於吏部不上者歲輸資錢三品以上六百六品以下一千木旱蟲霜減半資有文藝樂京上者每州七人六十不樂簡選者罷輪動官亦如之以征鎮功得護軍以上者納資減三之一凡流外九品取其書計時務其校試銓注與流內略同謂之小選吏部主事四人司封主事二人司勳主事四人考功主事三人

武德五年改選部曰吏部七年省侍郎貞觀二年復置龍朔元年改吏部曰司列主簿曰司封考功曰司績武后光宅元年改吏部曰天官垂拱元年改主簿曰司封天寶十一載改吏部曰文部至德二載復舊有吏部令史三十人書令史六十人制書令史十四人甲庫令史十一人亭長八人掌固十二人司封令史四人書令史九人掌固四人司勳令史三十三人書令史六十七人掌固四人考功令史十五人書令史三十人掌固四人司封郎中一人從五品上員外郎一人從六品上諸郎中員外郎品皆如之掌封命朝會賜予之級凡爵九等一曰王食邑萬戶正一品二曰嗣王郡王食邑

五千戶從一品三曰國公食邑三千戶從一品四曰開國郡公食邑二千戶正二品五曰開國縣公食邑千五百戶從二品六曰開國縣侯食邑千戶從三品七曰開國縣伯食邑七百戶正四品上八曰開國縣子食邑五百戶正五品上九曰開國縣男食邑三百戶從五品上皇兄弟皇子皆封國為親王皇太子子為郡王親王之子承嫡者為嗣王諸子為郡公以恩進者封郡王襲郡王嗣王者封國公皇姑為大長公主正一品姊為長公主女為公主皆視一品皇太子女為郡主從一品親王女為縣主從二品凡王公十五以上預朝集宗親女婦諸王長女月二參內命婦一品母為正四品郡君二品母為從四品郡君三品四品母為正五品縣君凡諸王公主外戚之家上視占相不入門王妃公主郡縣主贅居有子者不再嫁凡外命婦有六王嗣王郡王之母妻為妃文武官一品國公之母妻為國夫人三品以上母妻為郡夫人四品母妻為郡君五品母妻為縣君勳官四品有封者母妻為鄉君凡外命婦朝參視夫之品諸蕃三品以上母妻授封以制流外技術官不封母妻親王孺人二人視正五品賸十人視從六品二品賸八人視正七品國公及三品賸六人視從七品四品賸四人視正八品五品賸三人視從八品凡置賸上其數補以告身散官三品以上皆置賸凡封戶三丁以上為率歲租三之一入於朝廷食實封者得真戶分食諸州皇后諸王公主食邑皆有課戶名山大川畿內之地皆不以封司勳郎中一人員外郎二人掌官吏勳級凡十有二

轉為上柱國視正二品十有一轉為柱國視從二品十轉為上護軍視正三品九轉為護軍視從三品八轉為上輕車都尉視正四品七轉為輕車都尉視從四品六轉為上騎都尉視正五品五轉為騎都尉視從五品四轉為驍騎尉視正六品三轉為飛騎尉視從六品二轉為雲騎尉視正七品一轉為武騎尉視從七品凡以功授者覆實然後奏擬戰功則計殺獲之數堅城苦戰功第一者三轉出少擊多日上陣兵數相當曰中陣出多擊少曰下陣矢石未交陷堅突衆敵因而敗者曰跳盪殺獲十之四曰上獲十之二曰中獲十之一曰下獲凡酬功之等見任前資常選曰上資文武散官衛官勳官五品以上曰次資五品以上子孫上柱國柱國子勳官六品以下曰下資白丁衛士曰無資跳盪人上資加二階次資下資無資以次降凡上陣上獲五轉中獲四轉下獲三轉第二三等遞降焉中陣之上獲抵上陣之中獲中獲抵上陣之下獲下獲兩轉下陣之上獲抵中陣之中獲中獲抵中陣之下獲下獲一轉破蠻獠上陣上獲比兩番降二轉凡勳官九百人無職任者番上於兵部抵遠近為十二番以彊幹者為番頭留宿衛者為番月上外州分五番主城門倉庫執刀上柱國以下番上四年驍騎尉以下番上五年簡於兵部授散官不第者五品以上復番上四年六品以下五年簡如初再不中者十二年則番上六年八年則番上四年動至上柱國有餘則授周以上親無者賜物太常音聲人得五品以上勳非征討功不除簿諸州授勳人歲第勳之高下三月一報戶部有鑄免必驗

考功郎中員外郎各一人掌文武百官功過善惡之考法及其行狀若死而傳於史官諡於太常則以其行狀質其當不其欲銘於碑者則會百官議其宜述者以聞報其家其考法凡百司之長歲較其屬功過差以九等大合衆而讀之流內之官敘以四善一曰德義有聞二曰清慎明著三曰公平可稱四曰恪勤匪懈善狀之外有二十七最一日獻可替否拾遺補闕為近待之最二曰銓衡人物擢盡才良為選司之最三曰揚清激濁褒貶必當為考校之最四曰禮制儀式動合經典為禮官之最五曰音律克諧不失節奏為樂官之最六曰決斷不滯與奪合理為判事之最七曰部統有方警守無失為宿衛之最八曰兵士調習戎裝充備為督領之最九曰推鞠得情處斷平允為法官之最十曰讎校精審明於刊定為校正之最十一曰承旨敷奏吐納明敏為宣納之最十二曰訓導有方生徒克業為學官之最十三曰賞罰嚴明攻戰必勝為軍將之最十四曰禮義興行肅清所部為政教之最十五曰詳錄典正詞理兼舉為文史之最十六曰訪察精審彈舉必當為糾正之最十七曰明於勘覆稽失無隱為句檢之最十八曰職事修理供承彊濟為監掌之最十九曰功課皆充丁匠無怨為役使之最二十曰耕耨以時收穫成課為屯官之最二十一曰謹於蓋藏明於出納為倉庫之最二十二曰推步盈虛究理精密為曆官之最二十三曰占候醫卜效驗多著為方術之最二十四曰檢察有方行旅無壅為關津之最二十五曰市廛弗擾姦盜不行為市司之最二十六曰牧養肥碩蕃息孽多為牧

官之最二十七日邊境清肅城隍修理為鎮防之最
一最四善為上一最三善為上中一最二善為上
下無最而有二善為中上無最而有一善為中中職
事粗理善最不聞為中下愛憎任情處斷乖理為下
上背公向私職務廢闕為下中居官飾詐貪濁有狀
為下下凡考定皆集於尚書省唱第然後奏親王及
中書門下京官三品以上都督刺史都護節度觀察
使則奏功過狀以覈考行之上下每歲尚書省諸司
具州牧刺史縣令殊功異行災蝗祥瑞戶口賦役增
減盜賊多少皆上於考司監領之官以能撫養役使
者為功有耗亡者以十分為率一分為一殿博士助
教計講授多少為差親勳翊衛以行能功過為三等
親勳翊衛備身東宮親勳翊衛備身王府執仗親事
執乘親事及親勳翊衛主帥校尉直長品子雜任飛
騎皆上中下考有二上第者加階番考別為簿以待
郎顯掌之流外官以行能功過為四等清謹勤公為
上執事無私為中不勤其職為下貪濁有狀為下下
凡考中上以上每進一等加祿一季中中守本祿中
下以下每退一等奪祿一季中品以下四考皆中中
者進一階一中上考復進一階一上下考進二階計
當進而參有下考者以一中上覆一中下以一上下
覆二中下上中以上雖有下考從上第有下下考者
解任凡制勅不便有執奏者進其考貞觀初歲定京
官望高者二人分校京官外官考給事中中書舍人
各一人澁之號監中外官考使考功郎中判京官考
員外郎判外官考其後屢置監考校考知考使故事
考簿朱書吏緣為姦咸通十四年始以墨

戶部尚書一人正三品侍郎二人正四品下掌天下
土地人民錢穀之政貢賦之差其屬有四一日戶部
二日度支三日金部四日倉部戶部郎中員外郎掌
戶口土田賦役貢獻蠲免優復婚姻繼嗣之事以男
女之黃小中丁老為之帳籍以未業口分園宅均其
土田以租庸調斂其物以九等定天下之戶以為尚
書侍郎之貳其後以諸行郎官判錢穀而戶部度支
郎官失其職矣會昌二年著令以本行郎官分判錢
穀戶部巡官二人主事四人度支主事二人金部主
事三人倉部主事三人

高宗即位改民部曰戶部龍朔二年改戶部曰司
元度支曰司度金部曰司珍倉部曰司庾光宅元
年改戶部曰地官天寶十一載改金部曰司金倉
部曰司儲有戶部令史十七人書令史三十四人
計史一人亭長六人掌固十人度支令史十六人
書令史三十三人計史一人掌固四人金部主事
三人令史十人書令史二十一人計史一人掌固
四人倉部令史十二人書令史二十三人計史一
人掌固四人

度支郎中員外郎各一人掌天下租賦物產豐約之
宜水陸道涂之利歲計所出而支調之以近及遠與
中書門下議定乃奏

金部郎中員外郎各一人掌天下庫藏出納權衡度
量之數兩京市五市和市官市交易之事百官軍鎮
蕃客之賜及給宮人王妃官奴婢衣服

倉部郎中員外郎各一人掌天下軍儲出納租稅祿
糧倉廩之事以木契百合諸司出給之數以義倉常

平倉備凶年平穀價

禮部尚書一人正三品侍郎一人正四品下掌禮儀
祭享貢舉之政其屬有四一日禮部二日祠部三日
膳部四日主客禮部郎中員外郎掌禮樂學校衣冠
符印表疏圖書冊命祥瑞鋪設及百官官人喪葬贈
賻之數為尚書侍郎之貳五禮之儀一日吉禮二日
賓禮三日軍禮四日嘉禮五日凶禮凡齊衰心喪以
上奪情從職及周喪未練大功未葬皆不預宴大功
以上喪受冊涖官鼓吹從而不作戎事則否凡朝晚
入失儀御史錄名奪俸三奪者奏彈凡出蕃冊授手
贈者給衣冠皇帝巡幸兩京文武官職事五品以上
月朔以表參起居近州刺史遣使一參留守月遣使
起居北都則四時遣使起居諸司奏大事者前期三
日具狀長官躬署對仗伏奏仗下中書門下涖讀河
南太原府父老每歲上表願駕幸遣使以聞駕在都
則京兆府亦如之凡景星慶雲為大瑞其名物六十
有四白狼赤兔為上瑞其名物三十有八蒼鳥朱鴈
為中瑞其名物三十有二嘉禾芝草木連理為下瑞
其名物十四大瑞則百官詣闕奉賀餘瑞歲終員外
郎以聞有司告廟凡喪二品以上稱薨五品以上稱
卒自六品達於庶人稱死皇親三等以上喪舉哀有
司帳具給食諸蕃首領喪則主客鴻臚月奏禮部主
事二人祠部主事二人膳部主事二人主客主事二
人

武德三年改儀曹郎曰禮部郎中司藩郎曰主客
郎中龍朔二年改禮部曰司禮祠部曰司禮膳部
曰司膳光宅元年改禮部曰春官有禮部令史五

人書令史十一人亭長六人掌固八人祠部令史六人書令史十三人掌固四人主客令史四人書令史九人掌固四人

祠部郎中員外郎各一人掌祠祀享祭天文漏刻國忌廟諱卜筮醫藥僧尼之事珠玉珍寶供祭者不求於市駕部比部歲會牲之死亡輪皮於太府郊祭酒醴脯醢黍稷果實所司長官封署以供兩京及磧西諸州火祆歲再祀而禁民祈祭凡巡幸路次名山大川聖帝明王名臣墓州縣以官告祭二王後享廟則給牲牢祭器而完其帷幣几案客以四時省問凡國忌廢務日內教太常停習樂兩京文武五品以上及清官七品以上行香於寺觀凡名醫子弟試療病長官泣覆三年有驗者以名聞

膳部郎中員外郎各一人掌陵廟之牲豆酒膳諸司供奉口味躬鑄其鑾乃遣進胙亦如之非大禮大慶不獻食不進口味凡羊至廚而乳者釋之長生大齋日尚食進蔬食釋所殺羊為長生供奉凡獻食進口味不殺犢尚食有碎須別索必奏覆月終而會之凡尚食進食以種取而別嘗之殿中省主膳上食於諸陵以番上下四時遣食醫主食各一人泄之

主客郎中員外郎各一人掌二王後諸蕃朝見之事二王後子孫視正三品鄺公歲賜絹三百米粟亦如之介公減三之一殊俗入朝者始至之州給驛覆其人數謂之邊牒蕃州都督刺史朝集日視品給以衣冠袴褶乘傳者日四驛乘驛者六驛供客食料以四時輪鴻臚季終句會之客初至及辭設會第一等視三品第二等視四品第三等視五品蕃望非高者視

散官而減半參日設食路由大海者給祈羊豕皆一西南蕃使還者給入海程糧西北諸蕃則給度積程糧蕃客請宿衛者奏狀貌年齒突厥使置市坊有貿易錄奏為質其輕重太府丞一人泄之蕃王首領死子孫襲初授官兄弟子降一品兄弟子代攝者嫡年十五還以政使絕域者還上聞見及風俗之宜供饋贈貺之數

兵部尚書一人正三品侍郎二人正四品下掌武選地圖車馬甲械之政其屬有四曰兵部二曰職方三曰駕部四曰庫部凡將出征告廟授斧鉞重不從令大將專決還日具上其罪凡發兵降勅書於尚書尚書下文符放十人發十馬軍器出十皆不待勅衛士番直發一人以上必覆奏諸蕃首領至則備威儀郊導凡俘馘酬以絹入鈔之俘歸於司農郎中一人判帳及武官階品衛府衆寡校考給告身之事一人判簿及軍戎調遣之名數朝集祿賜假告之常員外郎一人掌貢舉雜請一人判南曹歲選解狀則覆簿書資歷考課皆為尚書侍郎之貳武散階四十有五從一品曰驃騎大將軍正二品曰輔國大將軍從二品曰鎮軍大將軍正三品上曰冠軍大將軍懷化大將軍正三品下曰懷化將軍從三品上曰雲麾將軍歸德大將軍從三品下曰歸德將軍正四品上曰忠武將軍正四品下曰壯武將軍懷化中郎將從四品上曰宣威將軍從四品下曰明威將軍歸德中郎將正五品上曰定遠將軍正五品下曰寧遠將軍懷化中郎將從五品上曰游騎將軍從五品下曰游擊將軍歸德郎將正六品上曰昭武校尉正六品下曰昭武

副尉懷化司階從六品上曰振威校尉從六品下曰振威副尉歸德司階正七品上曰致果校尉正七品下曰致果副尉懷化中候從七品上曰翊麾校尉從七品下曰翊麾副尉歸德中候正八品上曰宣節校尉正八品下曰宣節副尉懷化司戈從八品上曰禦侮校尉從八品下曰禦侮副尉歸德司戈正九品上曰仁勇校尉正九品下曰仁勇副尉懷化執戟長上從九品上曰陪戎校尉從九品下曰陪戎副尉歸德執戟長上自四品以上皆番上於兵部以遠近為八番三月以上三千里外者免番輪資如文散官唯追集乃上六品以下尚書省送符懷化大將軍歸德大將軍配諸衛上下餘直諸衛為十二番皆月上忠武將軍以下游擊將軍以上每番閱強殺者直諸衛番滿有將略者以名聞兵部主事四人職方主事二人駕部主事二人庫部主事二人

龍朔二年改兵部曰司戎職方曰司城駕部曰司典庫部曰司庫光宅元年改兵部曰夏官天寶十一載曰武部駕部曰司駕有兵部令史三十人書令史六十人制書令史十三人甲庫令史十三人亭長八人掌固十二人職方令史四人書令史九人掌固四人駕部令史十人書令史二十四人掌固四人庫部令史七人書令史十五人掌固四人職方郎中員外郎各一人掌地圖城隍鎮戍烽候防人道路之遠近及四裔歸化之事凡圖經非州縣增廢五年乃修歲與版籍倍上凡蕃客至鴻臚訊其國山川風土為圖奏之副上於職方殊俗入朝者圖其容狀衣服以聞

駕部郎中員外郎各一人掌輿輦車乘傳驛廐牧馬牛雜畜之籍凡給馬者一品八匹二品六匹三品五匹四品五匹四匹六品三匹七品以下二匹給傳乘者一品十馬二品九馬三品八馬四品五品四馬六品七品二馬八品九品一馬三品以上勅名者給四馬五品三馬六品以下有差凡驛馬給地四頃藉以首藉凡三十里有驛驛有長舉天下四方之所達為驛千六百三十九阻險無水草鎮戍者視路要隙置官馬水驛有舟凡傳驛馬驢每歲上其死損肥瘠之數

庫部郎中員外郎各一人掌戎器鹵簿儀仗元日冬至陳設祠祀喪葬辨其名數而供焉凡戎器色別而異處以衛尉幕士暴涼之京衛旗畫蹲獸立禽行幸則給飛走旗凡諸衛儀仗以御史蒞其度掌武庫器仗則兵部長官蒞其修完京官五品以上征行者假甲纛旗幡稍諸衛給弓千牛給甲

刑部尚書一人正三品侍郎一人正四品下掌律令刑法徒隸按覆讞禁之政其屬有四一日刑部二日都官三日比部四日司門刑部郎中員外郎掌律法按覆大理及天下奏讞為尚書侍郎之貳凡刑法之書有四一日律二日令三日格四日式凡鞠大獄以尚書侍郎與御史中丞大理卿為三司使凡國有大赦集囚徒於闕下以聽刑部主事四人都官主事二人比部主事四人司門主事二人

龍朔二年改刑部曰司刑都官曰司僕比部曰司計司門曰司關光宅元年改刑部曰秋官天寶十一載改刑部曰司憲比部曰司計有刑部令史十

九人書令史三十八人亭長六人掌固十人都官令史九人書令史十二人掌固四人比部令史十四人書令史二十七人計史一人掌固四人司門令史六人書令史十三人掌固四人

都官郎中員外郎各一人掌俘隸簿錄給衣糧醫藥而理其訴免凡反逆相坐沒其家配官曹長役為官奴婢一免者一歲三番役再免為雜戶亦曰官戶二歲五番役每番皆一月三免為良人六十以上及廢疾者為官戶七十為良人每歲孟春上其籍自黃口以上印臂仲冬送於都官條其生息而按比之樂工獸醫騙馬調馬羣頭裁接之人皆取焉附貴州縣者按比如平民不番上歲督丁資為錢一千五百丁婢中男五輪其一侍丁殘疾半輪凡居作者差以三等四歲以上為小十一以上為中二十以上為丁丁奴三當二役中奴下婢二當一役中婢二當一役比部郎中員外郎各一人掌句會內外賦斂經費俸祿公廩勳賜贖徒役課程逋欠之物及軍資械器和糴屯收所入京師倉庫三月一比諸司諸使京都四時句會於尚書省以後季句前季諸州則歲終總句焉

司門郎中員外郎各一人掌門關出入之籍及關遺之物凡著籍月一易之流內記官爵姓名流外記年齒貌狀非遷解不除凡有名者降墨勅勘銅魚木契然後入監門校尉巡日送平安凡奏事遣官送之晝題時刻夜題更籌命婦諸親朝參者內侍監校尉泣索凡輦輦車不入宮門關遺之物揭於門外榜以物色其年沒官天下關二十六有上中下之差度者本

司給過所出塞踰月者給行牒獵手所過給長籍三月一易蕃客往來閱其裝重入一關者餘關不議工部尚書一人正三品侍郎一人正四品下掌山澤屯田工匠諸司公廩紙筆墨之事其屬有四一日工部二日屯田三日虞部四日水部工部郎中員外郎各一人掌城池土木之工役程式為尚書侍郎之貳凡京都營繕皆下少府將作共其用役千功者先奏凡工匠以州縣為團五人為火五火置長一人四月至七月為長功二月三月八月九月為中功十月至正月為短功雇者日為絹三尺內中尚巧匠無作則納資凡津梁道路治以九月工部主事三人屯田主事二人虞部主事二人水部主事二人

武德三年改起部曰工部龍朔二年曰司平屯田曰司田虞部曰司虞水部曰司川光宅元年改工部曰冬官天寶十一載改虞部曰司虞水部曰司水工部有令史十二人書令史二十一人計史一人亭長六人掌固八人屯田令史七人書令史十二人計史一人掌固四人虞部令史四人書令史九人掌固四人水部令史四人書令史九人掌固四人

屯田郎中員外郎各一人掌天下屯田及京文武職田諸司公廩田以品給焉虞部郎中員外郎各一人掌京都衛闕苑囿山澤草木及百官蕃客時蔬薪炭供頓畋獵之事每歲春以戶小兒戶婢仗內蒔種溉灌冬則謹其蒙覆凡郊祠神壇五岳名山樵採芻牧皆有禁距墮三十步外得耕種春夏不伐木京兆河南府三百里內正月五月

九月禁弋獵山澤有寶可供用者以聞

水部郎中員外郎各一人掌津濟船楫渠梁堤堰溝
漁漁捕運漕碾磴之事凡坑陷并穴皆有標京畿有
渠長斗門長諸州堤堰刺史縣令以時檢行而洩其
決築有隸則以下戶分率禁爭利者

門下省侍中二人正二品掌出納帝命相禮儀凡國
家之務與中書令參總而顓判省事下之通上其制
有六一曰奏鈔以支度國用授六品以下官斷流以
下罪及除免官用之二曰奏彈三曰露布四曰議五
曰表六曰狀自露布以上乃審其餘覆奏盡制可而
授尚書省行幸則負責以從版奏中殿外辦還宮則
請降輅解嚴皇帝齋則請就齋室將奠則奉玉幣盟
則奉匱取盤酌暑水贊洗酌泛齊受虛爵進福酒皆
左右其儀饗宗廟進饗而贊酌鬱酒既饌贊酌醴齊
籍田則奉耒四裔朝見則承詔勞問臨軒命使冊皇
后皇太子則承詔降宣命慰問聘召則洩封題發驛
遣使則給魚符凡官爵廢置刑政損益授之史官既
書復洩其記注職事官六品以下進擬則審其稱否
而進退之

武德元年改侍內曰納言三年曰侍中龍朔二年
改門下省曰東臺侍中曰左相武后光宅元年曰
納言垂拱元年改門下省曰鸞臺開元元年曰黃
門省侍中曰監天寶元年曰左相

門下侍郎二人正三品掌貳侍中之職大祭祀則從
盟則奉巾既悅奠中奉匏爵贊獻元日冬至奏天下
祥瑞侍中關則洩封符券給傳驛
龍朔二年改黃門侍郎曰東臺侍郎武后垂拱元

年曰鸞臺侍郎天寶元年曰門下侍郎乾元元年

曰黃門侍郎大曆二年復舊

左散騎常侍二人正三品下掌規諷過失侍從顧問
隋廢散騎常侍貞觀元年復置十七年為職事官
顯慶二年分左右隸門下中書省皆金珥貂左
散騎與侍中為左貂右散騎與中書令為右貂謂
之八貂龍朔二年曰侍極

左諫議大夫四人正四品下掌諫諭得失侍從贊相
武后垂拱二年有魚保宗者上書請置詔以受四方
之書乃鑄銅匱四塗以方色列於朝堂青匱曰延恩
在東告養人勸農之事者投之丹匱曰招諫在南論
時政得失者投之白匱曰伸冤在西陳抑屈者投之
黑匱曰通元在北告天文祕謀者投之以諫議大夫
補闕拾遺一人充使知匱事御史中丞侍御史一人
為理匱使其後同為一匱天寶九載元宗以匱聲近
鬼改理匱使為獻納使至德元年復舊寶應元年命
中書門下擇正直清白官一人知匱以給事中中書
舍人為理匱使建中二年以御史中丞為理匱使諫
議大夫一人為知匱使投匱者使先驗副本開成三
年知匱使李中敏以為非所以廣聰明而慮幽枉也
乃奏罷驗副封

武德元年置諫議大夫龍朔二年曰正諫大夫貞
元四年分左右

給事中四人正五品上掌侍左右分判省事察弘文
館繕寫讎校之課凡百司奏抄侍中既審則駁正違
失詔勅不便者塗竄而奏還謂之塗歸季終奏駁正
之目大事覆奏小事署而頒之三司詳決失中則裁

其輕重發驛遣使則與侍郎審其事宜六品以下奏
擬則校功狀殿最行藝非其人則白侍中而更焉與
御史中書舍人聽天下冤滯而申理之門下省有錄
事四人從七品上主事四人從八品下

有令史二十二人書令史四十三人甲庫令史十
三人能書一人傳制二人亭長六人掌固十四人
修補制勅匠五人裝潢一人起居郎領令史三人
贊者六人武德三年改給事郎曰給事中
左補闕六人從七品上左拾遺六人從八品上掌供
奉諷諫大事廷議小則上封事

武后垂拱元年置補闕拾遺左右各二員

起居郎二人從六品上掌錄天子起居法度天子御
正殿則郎居左舍人居右有命俯陛以聽退而書之
季終以授史官貞觀初以給事中諫議大夫兼知起
居注或知起居事每仗下議政事起居郎一人執筆
記錄於前史官隨之其後復置起居舍人分侍左右
秉筆隨宰相入殿若仗在紫宸內閣則夾香案分立
殿下直第二螭首和墨濡筆皆即坳處時號螭頭高
宗臨朝不決事有所奏唯辭見而已許敬宗李義府
為相奏請多畏人之知也命起居郎舍人對仗承旨
仗下與百官皆出不復聞機務矣長壽中宰相姚璹
建議仗下後宰相一人錄軍國政要為時政紀月送
史館然率推美讓善事非其實未幾亦罷而起居郎
猶因制勅稍稍筆削以廣國史之闕起居舍人本記
言之職唯編詔書不及其事開元初復詔修史官非
供奉者皆隨仗而入位於起居郎舍人之次及李林
甫專權又廢太和九年詔入閣日起居郎舍人具紙

筆立竊頭下復貞觀故事

有令史三人贊者六人貞觀三年置起居郎廢舍人龍朔二年曰左史天授元年亦如之

典儀二人從九品下掌贊唱及殿中版位之次侍中版奏中嚴外辦亦贊焉

隋謁者臺有典儀武德五年復置諫門下省

城門郎四人從六品上掌京城皇城宮殿諸門開闔之節奉管鑰而出納之開則先外後內闔則先內後外啓閉有時不以時則詣闕覆奏

有令史二人書令史二人武德五年置門僕八百人番上送管鑰

符寶郎四人從六品上掌天子八寶及國之符節有事則請於內既事則奉而藏之大朝會則奉寶進於御座行幸則奉以從焉大事出符則藏其左而班其右以合中外之契兼以勅書小事則降符函封使合而行之凡命將遣使皆請旌節旌以顯賞節以顯殺有令史二人書令史三人主寶二人主符四人主節四人武后延載元年改符璽郎曰符寶郎開元元年亦曰符寶郎

弘文館學士掌詳正圖籍教授生徒朝廷制度沿革禮儀輕重皆參議焉

武德四年置修文館於門下省九年改曰弘文館貞觀元年詔京官職事五品已上子嗜書者二十四人隸館習書出禁中書法以授之其後又置講經博士儀鳳中置詳正學士校理圖籍武德後五品已上曰學士六品已上曰直學士又有文學直館皆它官領之武后垂拱後以宰相兼領館務號

館主給事中一人判館事神龍元年改弘文館曰昭文館以避孝敬皇帝之名二年曰修文館景龍二年置大學士四人以象四時學士八人以象八節直學士十二人以象十二時景雲中減其員數復爲昭文館開元七年曰弘文館置校書郎又有校理讎校錯誤等官長慶三年與詳正學士講經博士皆罷顯以五品已上曰學士六品已下曰直學士未登朝爲直館

校書郎二人從九品上掌校理典籍刊正錯謬凡學生教授考試如國子之制

有學生三十八人令史二人楷書十二人供進筆

二人典書二人楊書十三人筆匠三人熟紙裝潢

匠八人亭長二人掌固四人

中書省中書令二人正二品掌佐天子執大政而總判省事凡王言之制有七一日冊書立皇后皇太子封諸王臨軒冊命則用之二日制書大賞罰赦宥慮囚大除授則用之三曰慰勞制書褒勉贊勞則用之四曰發勅廢置州縣增減官吏發兵除免官爵授六品以上官則用之五日勅旨百官奏請施行則用之六曰論事勅書戒約臣下則用之七日勅牒隨事承制不易於舊則用之皆宣署申覆然後行焉大祭祀則相禮親征纂嚴則戒飭百官臨軒冊命則讀冊若命於朝則宣授而已冊太子則授璽綬凡制詔文章獻納以授記事之官

武德三年改內書省曰中書省內書令曰中書令龍朔二年改中書省曰西臺中書令曰右相光宅元年改中書曰鳳閣中書令曰內史開元元年改

中書省曰紫微省中書令曰紫微令天寶元年曰右相至大曆五年紫微侍郎乃復爲中書侍郎侍郎二人正三品掌貳令之職朝廷大政參議焉臨軒冊命爲使則持冊書授之四裔來朝則受其表疏而奏之獻贊幣則受以付有司舍人六人正五品上掌侍進奏參議表章凡詔旨制勅璽書冊命皆起草進畫既下則署行其禁有四日漏洩二曰稽緩三曰違失四曰忘誤制勅既行有誤則奏改之大朝會諸方起居則受其表狀大捷祥瑞百寮表賀亦如之冊命大臣則使持節讀冊命將帥有功及大賓客則勞問與給事中及御史三司鞠冤滯百司奏議考課皆預裁焉以久次者一人爲閣老判本省雜事又一人知制誥顯進畫給食於政事堂其餘分署制勅以六員分押尚書六曹佐宰相判案同署乃奏唯樞密遷授不預姚崇爲紫微令奏大事舍人爲商量狀與本狀皆下紫微令判二狀之是否然後乃奏開元初以它官掌詔勅冊命謂之兼知制誥肅宗即位又以它官知中書舍人事兵興急於權便政去臺閣決遺顯出宰相自是舍人不復押六曹之奏會昌末宰相李德裕建議臺閣常務州縣奏請復以舍人平處可否先是知制誥率用前行正郎宣宗時選尚書郎爲之主書四人從七品上主事四人從八品下

有令史二十三人書令史五十人能書四人蕃書譯語十人乘驛二十人傳制十人亭長十八人掌固二十四人裝制勅匠一人修補制勅匠五十人掌函掌案各二十人右散騎常侍二人右諫議大夫四人右補闕六人右

拾遺六人掌如門下省

起居舍人二人從六品上掌修記言之史錄制誥德音如記事之制季終以授國史

有楷書手四人典二人

通事舍人十六人從六品上掌朝見引納殿庭通奏凡近臣入侍文武就列則導其進退而贊其拜起出入之節蠻裔納貢皆受而進之軍出則受命勞遣既行則每月存問將士之家視其疾苦凱還則郊迎有令史十人典謁十人亭長十八人掌固二十四

人武德四年廢謁者臺改通事謁者曰通事舍人集賢殿書院學士直學士侍讀學士修撰官掌刊輯經籍凡圖書遺逸賢才隱滯則承旨以求之謀慮可施於時者述可行於世者考其學術以聞凡承旨撰集文章校理經籍月終則進課於內歲終則考最於外

開元五年乾元殿寫四部書置乾元院使有刊正官四人以一人判事揮院中使一人掌出入宣奏領中官監守院門知書官八人分掌四庫書六年乾元院更號麗正修書院置使及檢校官改修書官爲麗正殿直學士八年加文學直又加修撰校理刊正校勘官十一年置麗正院修書學士光順門外亦置書院十二年東都明福門外亦置麗正書院十三年改麗正修書院爲集賢殿書院五品以上爲學士六品以下爲直學士宰相一人爲學士知院事常侍一人爲副知院事又置判院一人押院中使一人元宗嘗選耆儒日一人侍讀以質史籍疑義至是置集賢院侍講學士侍讀直學士

其後又增修撰官校理官待制官留院官知檢討官文學直之員募能書者爲書直及寫御書人其後亦以前資常選三衛散官五品以上子孫爲之又置畫直至十九年以書直畫直楊書有官者爲直院至德二年置大學士貞元初置編錄官四年罷大學士八年罷校理置校書四人正字二人元和二年復置集賢校理罷校書正字四年集賢御書院學士直學士皆用五品如開元故事以學士一人年高者判院事非登朝官者爲校理餘皆罷初太宗卽位命京官五品以上更宿中書門下兩省以備訪問未徵中命弘文館學士一人日待制於武德殿西門文明元年詔京官五品以上清官日一人待制於章善明福門先天末又命朝集使六品以上二人隨仗待制未泰時動臣罷節制無職事皆待制於集賢門凡十三人崔祐甫爲相建議文官一品以上更直待制其後著令正衙待制官日二人

校書四人正九品下正字二人從九品上

有中使一人孔目官一人專知御書檢討八人知書官八人書直寫御書手九十人畫直六人裝書直十四人造筆直四人榻書六人典四人史館修撰四人掌修國史

貞觀三年置史館於門下省以它官兼領或卑位有才者亦以直館稱以宰相蒞修撰又於中書省置祕書內省修五代史開元二十年李林甫以宰相監修國史建議以爲中書切密之地史官記事隸門下省疏遠於是諫議大夫史館修撰尹愔奏

徙於中書省天寶後它官兼史職者日史館修撰初入爲直館元和六年宰相裴垕建議登朝官領史職者爲修撰以官高一判館事未登朝官皆爲直館大中八年廢史館直館二員增修撰四人分掌四季有令史二人楷書十二人寫國史楷書十八人楷書手二十五人典書二人亭長二人掌固四人熟紙匠六人

祕書省監一人從三品少監二人從四品上丞一人從五品上監掌經籍圖書之事領著作局少監爲之貳

武德四年改少令日少監龍朔二年改祕書省曰蘭臺監曰太史少監曰侍郎丞曰大夫祕書郎曰蘭臺郎武后垂拱元年祕書省曰麟臺太極元年曰祕書省有典書四人楷書十人令史四人書令史九人亭長六人掌固八人熟紙匠十人裝演匠十人筆匠六人

祕書郎三人從六品上掌四部圖籍以甲乙丙丁爲部皆有三本一曰正二曰副三曰貯凡課寫功程皆分判校書郎十人正九品上正字四人正九品下掌讎校典籍刊正文著著作局郎二人從五品上著作佐郎二人從六品上校書郎二人正九品上正字二人正九品下著作郎掌撰碑誌祝文祭文與佐郎分判局事

武德四年改著作曹曰局龍朔元年曰司文局郎曰郎中佐郎曰司文郎有楷書五人書令史一人書吏二人掌固四人司天臺監一人正三品少監二人正四品上丞一人

正六品上主簿二人正七品上主事一人正八品下監掌祭天文稽曆數凡日月星辰風雲氣色之異率其屬而占有通元院以藝學召至京師者居之凡天文圖書器物非其任不得與焉每季錄祥眚送門下中書省紀于起居注歲終上送史館歲頒曆于天下

武德四年改太史監曰太史局隸祕書省七年廢監候龍朔二年改太史局曰祕書閣局令曰祕書閣郎中武后光宅元年改太史局曰渾天監不隸麟臺俄改曰渾儀監置副監及丞主簿改司辰師曰司辰長安二年渾儀監復曰太史局廢副監及丞隸麟臺如故改天文博士曰靈臺郎曆博士曰保章正景龍二年改太史局曰太史監不隸祕書省復置丞景雲元年又為局隸祕書省踰月為監歲中復為局二年改曰渾儀監開元二年復曰太史監改令為監置少監十四年太史監復為局以監為令而廢少監天寶元年太史局復為監自是不隸祕書省乾元元年曰司天臺藝術人韓穎劉恆建議改令為監置通元院及主簿置五官監候及五官禮生十五人掌布諸壇神位五官楷書手五人掌寫御書有令史五人天文觀生九十八人文生五十人曆生五十五人初有天文博士二人正八品下曆博士一人從八品上司辰師五人正九品下裝書曆生掌候天文掌教習天文氣色掌寫御曆後皆省

春官夏官秋官冬官中官正各一人正五品上副正各一人正六品上掌司四時各司其方之變異冠加一星珠以應五緯衣從其方色元日冬至朔望朝會

及大禮各奏方事而服以朝見

乾元三年置五官正及副正

五官保章正二人從七品上五官監候二人正八品下五官司曆二人從八品上掌曆法及測景分至表準

五官靈臺郎各一人正七品下掌候天文之變五官掣壺正二人正八品上五官司辰八人正九品上漏刻博士六人從九品下掌知漏刻凡孔壺為漏浮箭為刻以考中星昏明更以擊鼓為節點以擊鐘為節武后長安二年置掣壺正乾元元年與靈臺郎保章正司曆司辰皆加五官之名有漏刻生四十人典鐘典鼓三百五十人初有刻漏視品刻漏典事掌知刻漏檢校刻漏後皆省

殿中省監一人從三品少監二人從四品上丞二人從五品上監掌天子服御之事其屬有六局曰尚食尚藥尚衣尚乘尚舍尚輦少監為之貳凡聽朝率屬執繳扇列于左右大朝會祭祀則進爵行幸則侍奉仗內驂乘百司皆納印而藏之大事聽焉有行從百司之印左右仗應左曰奔星右曰內駒兩仗內又有六殿一曰左飛二曰右飛三曰左萬四曰右萬五曰東南內六曰西南內園苑有官馬坊每歲河隴羣牧進其良者以供御六閑馬以殿中監及上乘主之武后萬歲通天元年置仗內六閑一曰飛龍二曰祥麟三曰鳳苑四曰鸞鸞五曰吉良六曰六羣亦號六殿以殿中丞檢校仗內閑殿以中官為內飛龍使聖曆中置閑殿使以殿中監承恩遇者為之分領殿中太僕之事而專掌輿輦牛馬自是宴游供奉殿中監皆

不豫開元初閑廐馬至萬餘匹駉駘巨象皆養焉以駝馬隸閑廐而尚乘局名存而已閑廐使押五坊以供時狩一曰鵬坊二曰鵠坊三曰鶴坊四曰鷹坊五曰狗坊侍御尚醫二人正六品上主事二人從九品上

武德元年改殿內監曰殿中省龍朔二年曰中御府監曰大監丞曰大夫有令史四人書令史十一人左右仗千牛各十人掌固亭長各八人舊有天藏府開元二十二年省

進馬五人正七品上掌大陳設戎服執鞭居立仗馬之左視馬進退

天寶八載罷南衙立仗馬因省進馬十二載復置乾元後又省大曆十四年復

尚食局奉御二人正五品下直長五人正七品上諸奉御直長品皆如之食醬八人正九品下奉御長儲供直長為之貳進御必辨時禁先嘗之饗百官賓客則與光祿視品秩而供凡諸陵月享視膳乃獻

龍朔二年改尚食局曰奉膳局諸局奉御皆曰大夫有書令史二人書吏五人主食十六人主膳八百四十人掌固八人

尚藥局奉御二人直長二人掌和御藥診視凡藥供御中書門下長官及諸衛上將軍各一人與監奉御泣之藥成醫佐以上先嘗疏本方具歲月日泄者署奏餌日奉御先嘗殿中監次之皇太子又次之然後進御太常每季閱送上藥而還其朽腐者左右羽林軍給藥飛騎萬騎病者頒焉

龍朔二年改尚藥局曰奉醫局有按摩師四人呪

禁師四人書令史二人書吏四人直官十人主藥十二人藥童三十人合口脂匠一人掌固四人侍御醫四人從六品上掌供奉診候司醫五人正八品下醫佐十人正九品下掌分療衆疾

皆貞觀中置

尚衣局奉御二人直長四人掌供冕服几案祭祀則奉鎮圭於監而進於天子大朝會設案

龍朔二年改尚衣局曰奉冕局有書令史三人書吏四人主衣十六人掌固四人

尚舍局奉御二人直長六人掌殿庭祭祀張設湯沐燈燭汎掃行幸則設三部帳幕有古帳大帳次帳小帳帳凡五等各三部其外則蔽以排城大朝會設黼宸施露席薰鑪朔望設帳而已

龍朔二年改尚舍局曰奉辰局有書令史三人書吏七人掌固十人幕士八十人舊有給使百二十人掌供御湯沐燈燭雜使貞觀中省

尚乘局奉御二人直長十人掌內外閑廐之馬左右六閑一日飛黃二曰吉良三曰龍媒四曰駒駘五曰駃騠六曰天苑凡外牧歲進良馬印以三花飛鳳之字飛龍底日以八馬列宮門之外號南衙立仗馬仗下乃退大陳設則居樂縣之北與象相次

龍朔二年改尚乘局曰奉駕局有書令史六人書吏十四人直官二十人習駟五百人掌閑五千人典事五人獸醫七十人掌固四人習駟掌調六閑之馬掌閑掌飼六閑之馬治其乘具鞍轡典事掌六閑芻粟太宗置司廩司庫高宗置習駟獸醫

司廩司庫各一人正九品下掌六閑糞糶出納奉乘十八人正九品下掌飼習御馬尚輦局奉御二人直長三人尚輦二人正九品下掌輦輦輦扇大朝會則陳于庭大祭祀則陳于廟皆繳二輪一扇一百五十有六既事而藏之常朝則去扇左右留者三

龍朔二年改尚輦局曰奉輦局有書令史二人書吏四人七輦主輦各六人掌扇六十人掌輦三十人掌輦四十二人奉輦十五人掌固六人掌扇掌輦掌執繳扇紙筆視雜供奉之事掌輦掌率主輦以供其事高宗置掌輦

內侍省監二人從三品少監二人內侍四人皆從四品上監掌內侍奉宣制令其屬六局曰掖庭宮闈奚官內僕內府內坊少監內侍爲之貳皇后親蠶則升壇執儀大駕出入爲夾引

武德四年改長秋監曰內侍監內承奉曰內常侍內承直曰內給事龍朔二年改監爲省武后垂拱元年曰司宮臺天寶十三年置內侍監改內侍曰少監尋更置內侍有高品一千六百九十六人品官白身二千九百三十二人令史八人書令史十六人

內常侍六人正五品下通判省事內給事十人從五品下掌承旨勞問分判省事凡元日冬至百官賀皇后則出入宣傳宮人衣服費用則具品秩計其多少春秋宣送於中書主事二人從九品下

內謁者監十人正六品下掌儀法宣奏承勅令及外

命婦名帳凡諸親命婦朝會者籍其數上內侍省命婦下車則導至朝堂奏聞

唐廢內謁者局置內典引十八人掌諸親命婦朝參出入導引有內亭長六人掌固八人

內謁者十二人從八品下掌諸親命婦朝集班位分洩諸門內寺伯六人正七品下掌糾察宮內不法歲餽則莅出入

寺人六人從七品下掌皇后出入執御刀冗從掖庭局令二人從七品下丞三人從八品下掌宮人簿帳女工凡宮人名籍司其除附公桑養蠶會其課業供奉物皆取焉婦人以罪配沒工縫巧者隸之無技能者隸司農諸司營作須女功者取於戶婢

有書令史四人書吏八人計史二人典事十人掌固四人計史掌料工程

宮教博士二人從九品下掌教習宮人書算衆藝初內文學館隸中書省以儒學者一人爲學士掌教宮人武后如意元年改曰習藝館又改曰萬林內教坊尋復舊有內教博士十八人經學五人史子集綴文三人楷書二人莊老太一篆書律令吟誄飛白書并碁各一人開元末館廢以內教博士以下隸內侍省中官爲之

監作四人從九品下掌監造雜作典工役

官闈局令二人從七品下丞二人從八品下掌侍官闈出入管籥凡享太廟皇后神主出入則率其屬與之總小給使學生之籍給以糧粟

有書令史三人書吏六人內闈史二十人內掌扇十六人內給使無常員小給使學生五十人掌固

四人凡無官品者號曰內給使掌諸門進物之曆
內閣史掌承傳諸門出納管籥內掌扇掌中宮徽
扇

欽定古今圖書集成經濟彙編銓衡典

第三十六卷目錄

官制部彙考十四

唐二

銓衡典第三十六卷

官制部彙考十四

唐二

按唐書百官志奚官局令二人正八品下丞二人正九品下掌奚隸工役官官之品官人病則供醫藥死給衣服各視其品陪陵而葬者將作給匠戶衛士營冢三品葬給百人四品八十八人五品六十八人六品七十品十人八品九品七人無品者斂以松棺五釘葬以犢車給三人皆監門校尉直長泄之內命婦五品以上無親戚者以近家同姓中男一人主祭於墓無同姓者春秋祠以少牢

有書令史三人書吏六人典事葉直掌固各四人內僕局令三人正八品下丞二人正九品下掌中宮車乘皇后出則令居左丞居右夾引

有書令史二人書吏四人駕士百四十人典事八人掌固八人駕士掌習御車與雜畜

內府局令二人正八品下丞二人正九品下掌中藏寶貨給納之數及供燈燭湯沐張設凡朝會五品已

上及有功將士蕃酋辭還皆賜於庭

有書令史二人書吏典史掌固各四人典事六人

太子內坊局令二人從五品下丞二人從七品下掌

東宮閣內及官人糧粟坊事五人從八品下

初內坊隸東宮開元二十七年隸內侍省為局改

典內曰令置丞坊事及導客舍人六人掌序導賓

客閣帥六人掌帥閣內人給使以供其事內閣人

八人掌承諸門出入管籥內藏扇燈燭內殿尉二

人掌車乘有錄事一人令史三人書令史五人典

事二人駕士三十人亭長掌固各二人

典直四人正九品下掌宮內儀式導引通傳勞問糾

勅非違察出納

內官貴妃惠妃麗妃華妃各一人正一品掌佐皇后

論婦禮於內無所不統

唐因隋制有貴妃淑妃德妃賢妃各一人為夫人

正一品昭儀昭容昭媛修儀修容修媛充儀充容

充媛各一人為九嬪正二品婕妤九人正三品美

人四人正四品才人五人正五品寶林二十七人

正六品御女二十七人正七品采女二十七人正

八品六尚亦曰諸尚書正三品二十四司亦曰諸

司事正四品二十四典亦曰諸典事正六品二十

四掌亦曰諸掌事龍朔二年置贊德二人正一品

宣儀四人正二品承恩五人正四品承旨五人正

五品衛仙六人正六品供奉八人正七品侍櫛二

十人正八品侍巾三十人正九品咸亨復舊開元

中元宗以后妃四星一為后有后而復置四妃非

典法乃置惠妃麗妃華妃以代三夫人又置六儀

美人才人增尚宮尚儀尚服三局諸司諸典自六

品至九品而止其後復置貴妃

淑儀德儀賢儀順儀婉儀芳儀各一人正二品掌教

九御四德率其屬以贊后禮

美人四人正三品掌率女官修祭祀賓客之事才人

七人正四品掌敘燕寢理絲枲以獻歲功官尚宮

局尚宮二人正五品六尚皆如之掌導引中宮總司

記司言司簿司闈凡六尚事物出納文籍皆泄其印

署

有女史六人掌執文書

司記二人正六品二十四司皆如之掌宮內文簿入

出錄為抄目審付行焉牒狀無違然後加印典記佐

之

典記二人正七品二十四典皆如之

掌記二人正八品二十四掌皆如之

司言典言各二人掌承勅宣付別鈔以授司闈傳外

掌言二人掌宣傳外司附奏受事者奏聞承勅處分

則錄所奏為案記

有女史四人

司簿典簿掌簿各二人掌女史以上名簿稟賜則品

別條錄為等

有女史六人

司闈六人掌諸閣管籥

典闈掌闈各六人掌分泣啓閉

有女史四人

尚儀局尚儀二人掌禮儀起居總司籍司樂司賓司

贊

司籍典籍掌籍各二人掌供御經籍分四部別爲目以時暴涼教學則簿記課業供奉几案紙筆皆預備焉

有女史十人

司樂典樂掌樂各四人掌宮縣及諸樂陳布之儀並其閱習

有女史二人

司賓典賓掌賓各二人掌賓客朝見受名以聞宴會則具品數以授尚食有賜物與尚功澁給

有女史二人

司贊典贊掌贊各二人掌賓客朝見宴食贊相導引會日引客立於殿庭司言宣勅坐然後引即席酒至起再拜食至亦起皆相其儀

形史二人正六品

有女史二人

尚服局尚服二人掌供服用采章之數總司寶司本司飾司仗

司寶二人掌神寶受命寶六寶及符契皆識其行用記以文簿

典寶掌寶各二人凡出付皆旬別案記還則朱書注

有女史四人

司衣典衣掌衣各二人掌宮內御服首飾整比以時進奉

有女史四人

司飾典飾掌飾各二人掌湯沐巾櫛凡供進識其寒溫之節

有女史二人

司仗典仗掌仗各二人掌仗衛之器凡立儀衛尚服率司仗等供其事

有女史二人

尚食局尚食二人掌供膳羞品齊總司膳司醢司藥司餼凡進食先嘗

司膳二人掌烹煎及膳羞米麪薪炭凡供奉口味皆種別封印

典膳掌膳各四人掌調和御食溫涼寒熱以時供進則嘗之

有女史四人

司醢典醢掌醢各二人掌酒醴醢飲以時進御

有女史二人

司藥典藥掌藥各二人掌醫方凡藥外進者簿案種別

有女史二人

司館典館掌館各二人掌給宮人餼食薪炭皆有等級受付則旬別案記

有女史四人

尚寢局尚寢二人掌燕見進御之次敘總司設司與司苑司燈

司設典設掌設各二人掌牀帷茵席鋪設久故者以狀聞凡汛掃之事典設以下分視

有女史四人

司典典與掌與各二人掌與鞶繳扇文物羽旄以時暴涼典與以下分察

有女史二人

司苑典苑掌苑各二人掌園苑蒔植蔬果典苑以下分察之果熟進御

有女史四人

司燈典燈掌燈各二人掌門閣燈燭晝漏盡一刻典燈以下分察

有女史二人

尚功局尚功二人掌女功之程總司製司珍司絲司計

司製典製掌製各二人掌供御衣服裁縫

有女史二人

司珍典珍掌珍各二人掌珠珍錢貨

有女史六人

司絲典絲掌絲各二人掌錦綵繅帛絲枲有賜用則旬別案記

有女史二人

司計典計掌計各二人給衣服飲食薪炭

有女史二人

宮正一人正五品司正二人正六品典正二人正七品宮正掌戒令糾禁譴罰之事宮人不供職者司正以牒取裁小事決罰大事奏聞

有女史四人阿監副監視七品

太子內官良娣二人正三品良媛六人正四品承徽十人正五品昭訓十六人正七品奉儀二十四人正九品

司閤二人從六品三司皆如之掌導引妃及宮人名簿總掌正掌書掌筵

掌正三人從八品九掌皆如之掌文書出入管綸紉

察推罰

有女史三人

掌書三人掌符契經籍宣傳啓奏教學稟賜紙筆

有女史三人

掌筵三人掌幄帟牀褥几案與綴汎掃鋪設

司則二人掌禮儀參見總掌殿掌縫掌藏

掌殿三人掌首飾衣服巾櫛膏沐服玩仗衛

有女史三人

掌縫三人掌裁紉織績

有女史三人

掌藏三人掌財貨珠寶緣綵

司饌二人掌進食先嘗總掌食掌醫掌園

有女史四人

掌食三人掌膳羞酒醴燈燭薪炭器皿

有女史四人

掌醫三人掌方藥優樂

有女史二人

掌園三人掌種植蔬果

有女史二人

御史臺大夫一人正三品中丞三人正四品下大夫

掌以刑法典章糾正百官之罪惡中丞爲之貳其屬

有二院一日臺院侍御史隸焉二曰殿院殿中侍御

史隸焉三曰察院監察御史隸焉凡冤而無告者三

司詰之三司謂御史大夫中書門下也大事奏裁小

事專達凡有彈劾御史以白大夫大事以方幅小事

署名而已有制覆囚則與刑部尚書平閱行幸乘輅

車爲導朝會則率其屬正百官之班序遲明列於兩

觀監察御史二人押班侍御史顯舉不如法者文武

官職事九品以上及二王後朝朔望文官五品以上

及兩省供奉官監察御史員外郎太常博士日參號

常參官武官三品以上三日一朝號九參官五品以

上及折衝當番者五日一朝號六參官弘文崇文館

國子監學生四時參凡諸王入廟及以恩追至者日

參九品以上自十月至二月袴褶以朝五品以上有

珂蕃官及四品非清官則否凡朝位以官職事同者

先爵爵同以齒致仕官居上職事與散官勳官合班

則文散官居職事之下武散官次之勳官又次之官

同者異姓爲後親王嗣王任文武官者從其班官卑

者從王品郡王任三品以下職事者居同階品之上

非任文武官者嗣王居太子太保之下郡王次之國

公居三品之下郡公居從三品之下縣公居四品之

下侯居從四品之下伯居五品之下子居從五品之

上男居從五品之下以前官召見者居本品見任之

上以理解者居同品之下本司參集者以職事爲上

下文武三品非職事官者朝參名簿皆稱曰諸公凡

出不踰四面關則不辭見都督刺史都護既辭候旨

於側門左右僕射侍中中書令初拜以表議中書門

下五品以上及諸司長官謝於正衙復進狀謝於側

門兩班三品以期望朝就食廊下殿中侍御史二人

爲使遣之

高宗改治書侍御史中丞以避帝名龍朔二年改

御史臺曰憲臺大夫曰大司憲中丞曰司憲大夫

武后文明元年改御史臺曰肅政臺光宅元年分

左右臺左臺知百司監軍旅右臺察州縣省風俗

尋命左臺兼察州縣兩臺歲再發使八人春日風

俗秋曰廉察以四十八條察州縣兩臺御史有假

有檢校有員外有試至神龍初皆廢景雲三年以

兩臺望齊糾舉苛察百僚厭其煩乃廢右臺延和

元年復置歲中以尚書省隸左臺月餘而右臺復

廢至德後諸道使府參佐皆以御史爲之謂之外

臺復有檢校裏行內供奉或兼或攝諸使下官亦

如之會昌初升大夫中丞品東都留臺有中丞一

人侍御史一人殿中侍御史二人監察御史三人

元和後不置中丞以侍御史殿中侍御史監察御

史主留臺務而三院御史亦不常備

侍御史六人從六品下掌糾舉百僚及入閣承詔知

推彈雜事凡三司理事與給事中中書舍人更直朝

堂若三司所按而非其長官則與刑部郎中員外郎

大理司直評事往訊彈劾則大夫中丞押奏大事法

冠朱衣纁裳白紗中單小事常服久次者一人知雜

事謂之雜端殿中監察職掌進名遷改及令史考第

臺內事顯決亦號臺端次一人知公廡次一人知彈

分京城諸司及諸州爲東西次一人知西推贓贖三

司受事號副端次一人知東推理贓等有不利舉者

罰之以殿中侍御史第一人同知東推范太倉出納

第一人同知西推范左藏出納號四推御史雙日臺

院受事雙日殿院受事次侍御史一人分司東都臺

凡御史以下遇長官於路去戴下馬長官斂轡止之

出入行止殿中以下視以爲法先後有罰入朝則與

殿中侍御史隨仗分入東則居侍中黃門侍郎給事

中之次西則居中書令侍郎舍人之次各居中丞大